



**Inatsisartut aaliangiiffigisassaattut siunnersuut, Naalakkersuisut peqquneqassasut kingusinnerpaamik UPA2017-mi allannguutissamik siunnersuuteqassasut, Kalaallit Nunaannut suliffissarsiortut killilersimaarnissaat pillugu Inatsisartut inatsisaanni § 6 imm. 3-mi, sulisitsisut atorfinitsitinissamik qinnuteqarnerisa kingorna ullut 14-it qaangiunneratigut kommune piffissap iluani aaliangiisimangippat, ingerlaannartumik atorfinitsisinnaanerup atorunnaarsinneqarnissaa pillugu.**  
(Inatsisartunut ilaasortaq Per Rosing-Petersen, Partii Naleraq)

Inatsisartunut ilaasortap Per Rosing-Petersenip aaliangiiffissatut siunnersuutaa Inuit Ataqatigiinniit imaattumik oqaaseqarfigissavarput.

Aallarniutigalugu oqaatigissavarput Inuit Ataqatigiinni siunnersuummut uunnga assingusumik UKA 2012-imi siunnersuuteqarnikuugatta taamanikkut amerlanerussuteqartunit akuerineqanngitsumik. Maannakkullu partiit apeqqummut uunnga aaqiinissamut siunnerfillit amerliallannerput nuannaarutigaarput.

Inuit Ataqatigiinni tunngaviusumik isumaqarpugut atorfiit inuttaqanngitsut sapinngisamik nunaqavissunik inuttalerneqartassasut, taamaaliornikkut assersuutigalugu akileraarutitigut isertitassat aammalu ilisimasat Nunatsinniinnarsinnaaniassammata. Inuit Ataqatigiit anguniagaraarputtaaq innuttaasut imminnut pilersorsinnaalerlutillu inuiaqatigiit aningaasarsiornikkut ineriartornerannut ikorfartueqataalersinneqassasut inuttut namminneq aamma ineriartuutigisaminnik.

Inuit Ataqatigiit isumaqarput avataanit suliarortitsisarnermut inatsisitta nutarternissaanut piffissanngortoq. Ullumikkut tamanit arajutsineqarsimajunnangilaq nunatsinni suliffissaaleqisorpassuaqartoq. Taamaakkaluartorli illoqarfinni annerni takulertornartoq tassaavoq sulisussanik avataaneersunik tikisitsiuarneq – pingaartumik sanaartornerup, eqqiaasitsisarnerup, akunnittarfeqarnerup neriniartarfeqarnerullu iluani, uffa atorfiit tamakku nunaqavissunik kivinneqarsinnaassasut takorloornaraluartoq. Soorunami pissutsit taamaalernerat attattuarneqarsinnaangilaq oqaatigisariaqarporlu tamanna Inatsisartut inatsisiliuuteqqaarnerannut naapertuukkunnaarsimasoq. Siunertarineqanngisaannarsimavoq suliffissaleqisoqartillugu aammalu sulisartunik Kalaallit Nunaanneersunik atorfinnut innersuussisoqarsinnaatillugu sulisussanik avataaneersunik atorfinitsitsisarnissaq.

Ullumikkut ajoraluartumik nunatsinni piffimmiit piffimmi allami atorfininniartut nammineq nuunnissartik aningaasartorfigigunikkut najugassaqaarunillu aatsaat atorfinissinnaasut tusarsaasarpog. Illuatungaani avataaneersunik atorfik taanna inuttalerneqassappat piumasaaqatit taamaagatik.

Qulaani taasagut tunngavilersuutigalugit siunnersuut ilalerlugu sukumiisumik ataatsimiitsitaliami susassaqaartumi suliarineqassasoq inassutigaarput.